

1903

OLYMPIA

2018

DRNÄBE

Fasnachtsgesellschaft Olympia 1908

Aim keit s Piccolo an Bode
Är liists uf, isch bitz vrschoobe
E Viertelnoote hinkt-r hindedryy
D Musig-Byyträäg wärde e Viertel tiefer syy
Dr Damourmajor dirigiert-ys wichtig
Schwänggt sy Stogg in jedi Richtig
Bim Comité duet är sich bedangge
Nur zwenig dief – macht zwanzig Frangge.
Am Kitschli fäält, das fäält no grad
an dr hinter Achse s linggi Rad
S' Comité froggt, wie-n-ych denn druff syg?!
Dr Rad-Abzug macht Fünf-Frangge fuffzig
Jä s Comité luegt allzu scharf
Kurlig yystoo – wemme das nimm darf
Kain steert ebbis an dr Situation
Doch s Comité stricht d Subvention
Clique, Wääge, Gugge, Bängg
Vom Comité in Baane glänggt
E Jury für jede Furz isch dr Bewyys
Am Änd het alles au e Bryys
Nit alles schlächt, wänn mir no sage
Und nur hochnäsig s miise klage
Für Sicherhait und Organisation
E Dangg fürs Wärk an dr Tradition
Abr: Will's si Status vyl z fescht nutzt:
Em Comité ghöre d Kuttle butzt.
Drum laufe mir; es isch verwääge
Nimm in dr Spur, sondern drnääbe.

Isch das Sujet jetzt doch z gwogt?
Het sich ägscht e mänge gfroggt
Ärnscht und für aimol nit nur luschtig
Mache mir die Medie gluschtig
„S' isch nur e Sujet, s isch jo nit meh“
„Das hän mr au scho so oft gseh“
Was haisst Sujet, und was haisst nur?
Dr Gaischt vo dr Fasnacht läbt dodrdur.
Mit Aigesinn und au bitz Hohn
Sueche mir d Konfrontation
Sin mir jetzt extrovertiert?
Well öpr s Comité vorfiehrt?
S isch doch d Uffgoob vo Satire
As me die Oobe mol lot gspyyre
Wenn sich allzu sälbschtverliebt
ain in sinre Rolle iebt
Fasnacht soll an Gränze go
Vo Sinn und Usdrugg sowieso
Friehner hets jo au scho glänggt
Wenn me s Comité het gsprängt
Dis Joor gön mir aigni Wääg
Nägscht Joor nüm – und ainewääg
Ischs nit dr afang und nit s Änd
Denn in öpis sin mir konsequänt
Fasnacht für alli und bitz au für uns
Fasnacht geg alles, und alles für d
Kunscht.